

19 MAY 1997

PM MUNCUL SECARA LANGSUNG DALAM HUBUNGAN VIDEO ESOK

KUALA LUMPUR, 19 Mei (Bernama) -- Perdana Menteri Datuk Seri Dr. Mahathir Mohamad akan muncul secara langsung melalui hubungan video mulai esok bagi membolehkan para pelabur Wales dan penuntut Malaysia mengikuti perjalanan persidangan mengenai Koridor Raya Multimedia (MSC) yang berlangsung di London.

Hubungan video itu diatur oleh Agensi Pembangunan Wales (WDA) dan Cardiff Bay Development Corporation dengan kerjasama Perbadanan Pembangunan Multimedia Malaysia.

Hubungan yang dibuat antara Imperial College, tempat berlangsungnya persidangan itu, dan Cardiff International Arena, akan membolehkan pelabur Wales mendapatkan maklumat secara langsung mengenai MSC di samping mengambil bahagian dalam sesi soal jawab, jelas WDA dalam kenyataan di sini hari ini.

Lebih 40 syarikat Wales dan syarikat-syarikat multinasional yang berpangkalan di negara itu termasuk syarikat-syarikat terkemuka seperti British Telecom, BBC, Mitel dan Pirelli Cables telah mengesahkan penyertaan masing-masing pada persidangan itu.

Pengerusi WDA, David Rowe-Beddoe, yang berkunjung ke Kuala Lumpur bulan lepas bagi meninjau secara lebih mendalam mengenai hasrat Malaysia berhubung MSC, adalah antara kira-kira 60 orang yang akan mengikuti perjalanan persidangan tersebut secara langsung.

Dalam lawatan tiga harinya ke sini, Rowe-Beddoe berkata Wales bersedia menawarkan kepada Malaysia kepakarannya dalam bidang perisian komputer dan sanggup memainkan peranan strategik untuk membantu negara ini memajukan MSC.

Sementara itu, kira-kira 15 penuntut akan turut serta dalam sesi berkenaan.

WDA ditubuhkan pada 1983 untuk meningkatkan pelaburan asing di Wales di samping membantu syarikat-syarikat negara itu memajukan perniagaan mereka di pasaran antarabangsa. -- BERNAMA

DAB DIN/sia